



TEZAUUR LITURGIC

7 IUNIE

SLUJBA SF. IERARH-MUCENIC ANDRONIC NIKOLSKI, ARHIEPISCOPUL PERMULUI



MOSCOVA, 2000



Месяца июня в 7-й день
Служба
святому священномученику
Андронику, архиепископу
Пермскому и Кунгурскому

НА ВЕЛИЦЕЙ ВЕЧЕРНИ

На Господи, воззвах: **стихиры, глас 8:**

Премудрости буйство избрав / суемудрие мира
посрамил еси / священномучениче Андрониче /
серафимам подражая богу выну предстоя /
ангельскому житию издетска ревнуя // смертью
любовь ко Христу венчал еси.

Вития богопросвещенный / огонь пылающий /
святителю Андрониче / вземши меч духовный /
еже есть глагол Божий / апостолом подражавый
/ заблуждших к свету обратил еси / советы
нечестивых обличил еси / победителю мужей
зовем ти: // моли Христа Бога просветитися
нам.

Делателю праведный / жатву обильную принесл
еси / святителю Андрониче / немощи немощных
на раменах ношаше / любовь и страхом к
единению призываше / истинныя веры столпе
обрелся еси. / Темже вопием ти: // моли Христа
Бога помиловати нас.

Отче Андрониче / чистоты сердца хранителю /
отеческих преданий ревнителю / соблазньства
мира побеждая / простотою жития к
следованию за Христом привлекая / странник и
пришлец бывая / к тихому пристанищу притекла
еси. // Моли Христа Бога спастися нам.

Ины стихиры, глас 5:

Гробницам мученическим притекая /
обретшееся в италийской стране иногда / на
путь страдальчества готовишася Андрониче. /
Зря же гробом повапленным уподобльшихся / от
неистовства позорищ / к потаенному сердца
человеку призывал еси / мы же одобелевшие
душою взывам ти: // неотступным буди
ходатаем за нас пред Богом.

Земли Российския печальниче, / пастырю
добрый, / любящий отец чад церковных, /
грозный обличителю гонителей неправедных /
святой священномучениче Андрониче, /
кормчий верный к тихому пристанищу, / молим
тя, грехми обремененныя: // неотступным буди
ходатаем за нас пред Богом.

Мук грядущих мирно ожидая / кротостию и
твердостью безумствующих устрашая / Христу
послушлив даже до смерти быв, святителю
Андрониче. / Справедливо ли слушать вас более,
нежели Бога - / беззаконующим рекл еси / и за

овцы душу твою положил еси / мы же память твою совершающе зовем ти: // неотступным буди ходатаем за нас пред Богом.

Аще от земных трудов и упокоился еси, / и не обретеса мощи твои, святителю Андрониче, / но сырых твоих чад не оставил еси, / в горних селениях водворившеся, / на землю нашу во страстех влающуюся / Божие благословение призываеши. Мы же благодарственно вопием ти: // радуйся, угодниче Господень всехвальный.

Слава, глас 6:

Неблаженное житие скончавая / кровьюми украсился еси святителю Андрониче, / жертвою благоугодной принеслся еси / за беззакония людстии / живым был погребен еси / от юности Христу спогребшийся / Егоже непрестанно моли, вопием ти, // да избавит нас от тли омертвелых.

И ныне, праздника или Богородичен, глас тойже: Кто Тебе не ублажит:

Вход. Прокимен дне. И чтения три мученическая.

На литии стихиры, глас 3:

Приидите, прославим вернии / светозарную звезду возсиявшую / Андроника всехвальнаго /

святителя изряднаго / во апостольстве
потрудившагося / в преподобии
подвизавшагося / в мученичестве просиявшаго
// молящегося о душах наших.

Притецьте, осетинския пастырие / вернии
японстей страны / новгородския и сибирския
людие / православныя Пермския и всея
Российския земли / воспоим заступника нашего
/ воина Христова святителя / пастыря и
мученика новаго // молящегося о душах наших.

Слава, глас 7:

Светом невечерним просвещен, / светло
незаходимое восшел еси, святителю Андрониче,
/ тьму ярящуюся разгоняя; / ныне же, Отцу
Светов предстоя, // поминай поющих тя,
всечестне.

**И ныне, праздника или Богородичен, глас
тойже: Под кров Твой, Владычице:**

На стиховне стихиры, глас 2:

Органе громогласный / небеснаго жительства
проповедниче / священнотаинниче Андрониче /
Христов добрый оружниче / мужей неразумных
победителю / и к покаянию неослабный
путевождь // моли даровати нам велию
милость.

**Стих: Праведник яко финикс процветет, // яко
кедр, иже в Ливане, умножится.**

О вышних пецися научая, / земная мудрования оставив, / ризы убеленные истка себе, святителю премудрый. / Нам же в срамные рубища грехов облеченных / и на вечерю господню войти не дерзающим, // моли Христа Бога даровати мир и велию милость.

Стих: Насаждения в дому Господни, // во дворех Бога нашего процветут.

Тесными враты следуя, / язвы Господа на теле всяк день нося / отеческую любовь источал еси святителю Андрониче. / Ныне же с горними силами ликовствуя // моли даровати нам мир и велию милость.

Слава, глас 6:

Веселый нрав юности скорбми умертвив, / на рамена поношение Христово взявши / немощь естества превозмогая / к веселию вечному востекл еси, святителю Андрониче. / Учителю благочестия, / дерзновенный проповедниче, / неключимых рабов наставниче, // испроси нам мир и велию милость.

И ныне, праздника или Богородичен, глас тойже.

Тропарь, глас 5:

Меч духовный взял священномучениче, / за Церковь и Отечество воинствовал еси; / и духом пламенея богомудре, / любовь Христову стяжал

еси. / Жизнь убо временную ни во что вменив, /
в жертву себе принесл еси. / Мы же, грешнии,
молим тя, святителю Андрониче, //
неотступным буди ходатаем за нас пред Богом.

НА УТРЕНИ

По 1-м стихословии седален, глас 2:

Мудрым рыбарем подражая, / работу гибнущую
оставив, / от сетей вражиих избавься, славнее
Андрониче, / ловитву добрую сотворил еси //
сетию благодати Христовой.

Слава, и ныне, праздника или Богородичен.

По 2-м стихословии седален, глас 2:

Правды алчущи Божией, / двизания плоти
умертвил, блаженне Андрониче, / росую
благодати небесной орошаем, / процвел еси яко
крин благоуханный // алчущих слова
напитавая.

Слава, и ныне, праздника или Богородичен.

По полиелеи седален, глас 6:

Веруя возглаголар, святителю: / воскреснет
Россия, в безбожии гибнущая, / возвратится ко
Христу заблуждшее чадо. / Тою же надеждею
нас укрепляя, / примирению озлобленных учил,
блаженне, / и к Церкви Святых прилеплятися

заповедал, / идеже сам с небесными силами
ныне совокупився, // поминай нас, чтущих
память твою.

Слава, и ныне, праздника или Богородичен.

Степенна, 1-й антифон 4-го гласа.

Прокимен, глас 4: Честна пред Господем //
смерть преподобных Его.

Стих: Что воздам Господеви о всех, яже воздаде
ми.

Всякое дыхание: Евангелие от Луки, зачало 67:

Рече Господь: не бойся малое стадо:

По 50-м псалме стихира со стиховны, глас 6:

Веселый нрав юности:

Канон Богородицы на 6 и святого на 8.

Канон святого, глас 6, егоже краегранесие:

Огненнаго Андроника песньми восхвалим.

Песнь 1

Ирмос: Волною морскою / Скрывшаго древле /
гонителя мучителя, / под землею скрыша
спасенных отроцы: / но мы, яко отроковицы
Господеви поим, // славно бо прославися.

Отверзи, Господи, сердце мое теплохладное, /
просвети ум мой непокоривый / и язык
безсловестный разреши от уз нечистоты / к
похвалению немощнаго воздвизая молитвами

угодника Твоего Андроника.

Господеви работать измлада возжелев
блаженнее, / ко храму Божию якоже елень на
источницы водныя устремлялся еси / и нас, Тебе
празднующих водою животворною напои.

На иноческий подвиг Кронштадтским пастырем
благословен, / проразумно победитель мужей
нареклся еси Андрониче; / в ангельском же чине
неустанно подвизаясь, / по имени и житие
стяжал еси.

Богородичен: Его же трепещет всякая тварь / во
чреве Твоем прияла еси Дево Богоневесто
неизреченно; / да воспримет и исцелит естество
мое падшее.

Песнь 3

Ирмос: Утверди, Господи, на камени заповедей
Твоих подвигшееся сердце мое, яко Един Свят и
Господь.

На труды апостольские призываем, / яко ангел в
Вифлееме иногда благовествующе, / пастырем
явился в Осетинской стране, блаженне, /
Христово пришествие, спасение и мир
человекам возвещай.

На будущие страдания и скорби уготовляему, /
Рим подобаше ти видети, преподобне, / идеже у
гробниц первомучеников огнем божественным
распалался / и Павловы болезни и труды

поминая / хождению по путем Божиим
научался еси.

Афинеев благонравие в оскудении видя / об
утверждении Руси Святой помышляя еси
Андрониче. / Егда же виде латинян яко на
зрелище в храм грядущих, / недоуменно
пребывая, разгорячение крови их яко
смоковницу безплодную вменял еси.

Господней десницею якоже Авраам в земли
чуждей водимый / к апостолу Японии святителю
Николаю управлен быв премудре; / идеже
благодати Божией обильно содействующей
дивяся / в непрестанных трудах благовестия и
болезнях обрелся еси Андрониче.

Богородичен: Ослепленного житейскими
сластями / неключимаго раба и лукаваго /
утверди во стезях Твоих ходити, Владыко
Христе Боже наш, / молитвами Рождшия Тя.

Седален, глас 4:

Духом уст воинствуя, / непорочным житием яко
щитом огражден, / пламень огненный в
скудельнице сердца нося, / во брани креплий
явился еси, священномучениче Андрониче, /
отечество в верности Православию выну
утверждая.

**Слава, и ныне, праздника или Богородичен, глас
тойже:**

Деве Всепетая, / Лествице Умная, / скорбящих
всех Помоще, / Стено Нерушимая, / в печалех и
бедах Утешительница, / скорый Покров и
Заступница / взыщи погибающих нас в
беззакониих.

Песнь 4

Ирмос: Услыша пророк / пришествие Твое,
Господи, и убояся: / яко хочещи от Девы
родитися, / и человеком явитися, и глаголаше: /
услышах слух Твой, и убояхся, // слава силе
Твоей, Господи.

Архиерейством почтен быв, славне, / яко
пастырь добрый плакаше с плачущими и
радовашеся с радующимися / в Японстей
стране в дома на всяк день входя / яко по
пропадем распуженные овцы собирая.

Новгородскую землю в удел святительский
прияв, / пределы ея обхождаше, преподобне, /
Христу главу не имущему где подклонити,
последуя, / нравы исправляя, страсти и пороки
обличая, / младенцев возвращать в вере научая /
— все добре, творил еси.

Делатель винограда Божия истинный ты еси
Адрониче / волчцы бо и тернии огнем словес
евангельских посекая, / не давал сна очима и
веждама твоим дремания / к покою горних
селений влекомый.

Богородичен: Рождество Твое Пречистая Дево
изъяснить всяк ум не может: / како на руках
носиши Егоже десницею мир носим; / како
питаеши о всей твари Промышляющаго.

Песнь 5

Ирмос: От ноци утренююща, Человеколюбче,
просвети, молюся, и настави и мене на
повеления Твоя и научи мя, Спасе, творити волю
Твою

От юности чистоту сердца супружницею избрав,
преподобне, / монашеский образ взыскав /
истинный ревнитель иноческих правил обрелся
еси, славне.

Ночными бдении пред Божественной службой, /
постом и воздержанием, смиренной усердной
молитвою / и простотою словес Твоих / житие
нескверное Богу угодное приносил Андрониче.

Истину возлюбив паче мира сего / и богатства
его яко уметы вменяя, блаженне, / чресла
препоясав и земныя славы бегая / к славе
небесней простираясь сокровищницу Духа
наполнял еси.

Богородичен: Кто не прославит рождества
Твоего Богоневесто, / токмо возлюбивый тму
века сего; / Тобою бо явился нам благодать,
просвещающая вся концы.

Песнь 6

Ирмос: Обыде мя бездна последняя греховная,
пожре мя множество зол моих, и, стена, вопию
Ти, Боже мой: яко пророка Иону, избави,
Многомилостиве.

Архиерею изрядный / на престоле святителя
Стефана возжен был еси, святильниче святой, /
идеже много потрудишася о просвещении
Пермской страны / теплую веру возгревая,
храмы возводя; / пастырей и учителей
словесных пестун, / сирых и убогих питатель
явился славне.

Печалуя об оскудении веры / и ослеплении умов,
гордостью помраченных, / оледеневшие сердца
благодатными словесы твоими пробуждал, /
нерадящих о спасении взыскивал, /
непокоривыя к послушанию приводил,
Андрониче, / бедствующия люди к покаянию
призывая.

Еретическия и безбожныя новыя учения / от
врага спасения навеваемыя обличая / и тем
губительных волков, расхищающих стадо
посрамляя, / к пажитям Христовым чад
церковных упасл еси святителю премудрый.

Богородичен: Слатьми греховными в погибель
погружаемых / и от треволнения житейского
моря потопляемых / не презри, Владычице

Богородице, призывающих Тя всем сердцем / на милости Твоя уповающих.

Кондак, глас 4:

Якоже апостол славный Павел, / простотою себе украсил еси; / почестей и славы избегая, / в чистоте пред Богом подвизался еси; / архипастырство тяжкое пронесый, / мученическим венцем увенчан // Небесному ныне Архиерею предстоиши.

Икос:

Ангелом Церкви наша нареченный, / Ея же ради и живот твой положил еси, святителю, / в сонме новомучеников Российских ныне просиявый / прими от нас, подвиги твоя и теплое предстательство поминающих, похвалу сию: / радуйся, Божий избранниче, священная главо; / радуйся, добропобедный о Христе воинниче. / Радуйся, странниче смиренный; / радуйся, Небеснаго Иерусалима взыскателю. / Радуйся, горним силам в любви уподобивыйся; / радуйся, отечество земное в сердце свое вместивый. / Радуйся, в ризу убеленную одеявшийся; / радуйся, в подвизех и страданиях победивый. / Радуйся, святителю Андрониче, Христовы Церкви велелепое украшение.

Песнь 7

Ирмос: Отроцы в Вавилоне / пещнаго пламене
не убояшася, / но посреде пламене ввержени,
орошаеми пояху: // благословен еси Господи,
Боже отец наших.

Нарече тя огонь пылающий / собор отцев, иже в
Москве собранный; / серафимски бо к Богу
любовию пламенея, / отечество земное
возвратится к Каменю, / егоже отвергли
зиждущии новое царство / звал Андрониче,
вопия: / благословен еси, Господи, Боже отец
наших.

Мятежи, насильства и разграбления храмов
безбожными чинимья не терпя, / на страже
веры став, славнее, / увещавал беззаконнующих
непрестанно, / святительским своим омофором
от посягательств Церковь, вверенную ти
покрывая.

Истине ревнуя, прелесть рая земнаго отвергнув,
/ безбожия лжу, беззаконие и безстудие
мужественно обличал еси, премудре, /
Небеснаго Царствия проповедниче быв
воспевая: / благословен еси, Господи, Боже отец
наших.

Богородичен: Высшая всякия твари явилася
еси, Богорадованная Владычице, / чистотою
Твоею кивотом священным соделавшаяся / и
огнь Божества неопально приимшая.

Песнь 8

Ирмос: За законы отеческия блаженнии в Вавилоне юноши, пребедствующе, царюющаго оплеваша повеление безумное, и, совокуплени имже не сваришася огнем, Державствующему достойную воспеваху песнь: Господа пойте, дела, и превозносите во вся веки.

Оком духовным страдание и смерть свою провидя, / тих и мирен пребывал еси, блаженне, / даже до крове уготовляясь в истине стояти взывая: Господа пойте, дела, и превозносите во вся веки.

Скорбями яко злато в горниле искушен быв, Андрониче, / кормчий непристашен корабля церковнаго / зело обуреваемого житейским морем явился еси вопия: / Господа пойте, дела, и превозносите во вся веки.

Христу подобясь во Иерусалим на страсть Грядущему, славнее, / безумие гонителей посрамляя / торжество веры Православныя знаменовал еси, / егда во дни Пасхи на крестный ход множество народа собрал еси / единеми сердцем и усты воспевающих: / Господа пойте, дела, и превозносите во вся веки.

Богородичен: Выну зовем Ти со архангельским гласом: / радуйся, Богоблагодатная Богородице Дево, / и под кров Твой прибегаем / яко скорой Помощнице во всяком обстоянии.

Песнь 9

Ирмос: Безсеменнаго зачатия Рождество
Несказанное / Матере безмужныя нетленен
Плод: / Божие бо Рождение обновляет естества.
/ Темже Тя вси роди, / яко богоневестную
Матерь, // православно величаем.

Апостольство и святительство проняся, / в
преподобии и правде пожив, / во сто крат
уплодоносился еси Владыце, славне, / в
последняя же и мученичества сподобльшися.

Люте озлобленныя гонители страшишася
благоухания словес твоих, Андрониче, / со
оружием и дрекольми тысящным войском
нощию тя обступиша; / нечестием же своим
обличаемы, / беззаконный суд вне града
спешиша учинити.

Исполнившуся празднику Вознесения Господня,
/ преисполнен елеем добродетелей явился еси
священномучениче, / приятие Духа Небеснаго
ожидая / в горняя селения к Небесному
Отечеству духом возносился еси / прах клевет и
поруганий безумствующих от одежд убеленных
оттрясая.

Богородичен: Моления сия наша не презри,
Пренепорочная, / но Сыну Твоему и Богу
принеси, Всемиловитая, / да спасет нас от огня
вечнующаго предстательством Твоим / и
святаго отца нашего Андроника.

Светилен:

Светом Невечерним просвещен, / светило
незаходимое восшел еси, Андрониче, / тму
ярящуюся разгоняя; / ныне же, Отцу Светов
предстоя, / поминай поющих тя, всечестне.

Слава, и ныне, Богородичен:

Светом девства, Чистая, преукрасившись,
Матерь Света соделалась, Богородице Дево; о
всех молиши Сына твоего и Бога нашего
спастися, просвети, взываю Ти, и тьму мою,
Владычице.

На хвалитех стихиры на 4, глас 4:

Како восхваляю тя, славне, / по имени
жителство стяжавшаго / мужей победителю /
святителю Андрониче / любовь сердца ко
Христу привлекшаго, / скорбящих утешителю, /
озлобленных примирителю // о всякой душе
попечителю неустанный.

Киими похвалами воспою тя, / огонь пылающий
нарекшийся, / вертоградарю изрядный, /
евангельское семя обильно возрадивый /
тернии и волчцы пламенем словес посекий /
плод явивый благий // Андрониче добрый
пастырю наш.

Авраамски пешпшествовав иногда / куплю
добрую дея / многоценный бисер стяжал еси,
святителю. / С мудрыми девами сопричтен /

верный рабе явился Владыце, / тяготу дневнаго
зноя понесший // поминай воспевающих тя,
достославне.

Изнемогает скудный ум / и язык гугниво
хвалити тя, / вития благолюбивый, /
доблемудренный наставниче, / святителю отче
Андрониче, // ходатаю усердный о душах
наших.

Слава, глас 1:

Страсти воюющия победив, / соблазнства море
преплывая, / на вольную страсть взыде
святителю, / Христу последуя. / Безгласен яко
агнец был еси, / егоже глас пробуждаше от сна
греховнаго. / Священнотаинниче Андрониче, //
моли от страствований лютых сохранитися нам.

И ныне, праздника или Богородичен, глас
тойже: Дево Всепетая:

НА ЛИТУРГИИ

Блаженны от канона, песни 3-я и 6-я.

Прокимен, глас 7: Восхвалятся преподобнии во
славе, / и возрадуются на ложах своих.

Стих: Воспойте Господеви песнь нову:

Апостол ко евреем, зачало 334.

Аллилуия, глас 2: Священницы Твои облекутся в
правду: Евангелие от Луки, зачало 67.

Причастен: В память вечную будет праведник...